

PWYLLGOR SGRIWTINI PARTNERIAETH AC ADFYWIO

Cofnodion y cyfarfod rhithiol a gynhaliwyd ar yr 28ain o Fehefin 2021

- PRESENNOL:** Cynghorydd Gwilym O Jones (Cadeirydd)
Cynghorydd Glyn Haynes (Is-Gadeirydd)
- Cynghorwyr T LI Hughes MBE, K P Hughes, Vaughan Hughes, Alun Roberts, Dafydd Roberts a Margaret Murley Roberts.
- Arweinydd y Cyngor – Cynghorydd Llinos M Huws
Cynghorydd Carwyn Jones – Deilydd Portffolio Prosiectau Mawr a Datblygiad Economaidd.
- WRTH LAW:** Prif Weithredwr,
Dirprwy Brif Weithredwr,
Cyfarwyddwr Gwasanaethau Cymdeithasol (ar gyfer eitem 3),
Pennaeth Gwasanaethau Democrataidd,
Swyddog Sgriwtini (SR),
Swyddog Pwyllgor (MEH)
- YMDDIHEURIADAU:** Cynghorwyr R LI Jones a Nicola Roberts.
- HEFYD YN BRESENNOL:** Ms Catrin Roberts - Pennaeth Cydweithio Rhanbarthol (ar gyfer eitem 3);
Ms Nonn Hughes - Rheolwr Rhaglen Bwrdd Gwasanaethau Cyhoeddus Gwynedd ac Ynys Môn (ar gyfer eitem 4);
Ms Alwen Williams a Mr Hedd Williams - Bwrdd Uchelgais Economaidd Gogledd Cymru (eitem 5).
-

1 YMDDIHEURIADAU

Fel y nodwyd uchod.

2 DATGANIAD O DDIDDORDEB

Ni dderbyniwyd yr un datganiad o ddiddordeb.

3 ADRODDIAD BLYNYDDOL BWRDD PARTNERIAETH GOGLEDD CYMRU (RHAN 9)- 2020/21

Cyflwynwyd - adroddiad gan Gyfarwyddwr y Gwasanaethau Cymdeithasol ynglŷn â'r uchod.

Dyweddodd Arweinydd y Cyngor a'r Deilydd Portffolio Gwasanaethau Cymdeithasol ei bod hi'n ofynnol o fewn Rhan 9 o Ddeddf Gwasanaethau Cymdeithasol a Llesiant (Cymru) 2014 fod pob Bwrdd Partneriaeth Rhanbarthol yn paratoi, cyhoeddi a chyflwyno eu Hadroddiad Blynyddol i Lywodraeth Cymru. Mae'r Ddeddf yn ei gwneud hi'n ofynnol i awdurdodau lleol wneud trefniadau i hyrwyddo cydweithio gyda'i bartneriaid perthnasol ac eraill, mewn perthynas ag oedolion sydd ag anghenion gofal a chefnogaeth, gofalwyr a phlant. Mae'n gosod dyletswydd ar bartneriaid perthnasol i gyd-weithio a, ac i ddarparu gwybodaeth i'r awdurdodau lleol at ddibenion eu swyddogaeth gofal cymdeithasol. Esboniodd tra bod yr Awdurdod yn cyfrannu oddi fewn i'r Bwrdd Partneriaeth, mae hefyd yn cymryd mantais o'r cyfleoedd sydd wedi dod yn sgil y Bwrdd.

Fe wnaeth y Pennaeth Cydweithio Rhanbarthol adrodd fod y Bwrdd Partneriaeth wedi parhau i gwrdd yn fisol, er bod y pandemig wedi effeithio ar brosiectau'r Bwrdd. Mae'r Bwrdd yn parhau i adolygu'r prif egwyddorion o fewn y Ddeddf ac yn sicrhau fod blaenoriaethau'r Bwrdd yn gynaliadwy ac yn cwrdd â'r gofyniad mewn perthynas â gofal a chefnogaeth ar gyfer plant ac oedolion. Nododd mai pwrpas Rhan 9 o'r Ddeddf yw gwella canlyniadau a lles pobl, ynghyd a gwella effeithiolrwydd ac effeithlonrwydd darpariaeth y gwasanaeth. Felly, gellir disgrifio amcanion allweddol cydweithredu, partneriaeth ac integreiddio fel a ganlyn:

- Gwella gofal a chefnogaeth, gan sicrhau fod gan bobl fwy o lais a rheolaeth;
- Gwella canlyniadau ac iechyd a lles;
- Darparu gofal a chefnogaeth gydlynol sy'n canolbwyntio ar yr unigolyn;
- Gwneud defnydd mwy effeithiol o adnoddau, sgiliau ac arbenigedd.

Dyweddodd Pennaeth Cydweithio Rhanbarthol fod Llywodraeth Cymru wedi cyhoeddi Canllaw Statudol Rhan 9 wedi'i ddiweddarau yn Ionawr 2020 ac mae Bwrdd Partneriaeth Rhanbarthol Gogledd Cymru yn gweithio yn unol â'r Canllaw hwn. Mae'r prif newidiadau yn ymwneud ag aelodaeth ychwanegol, ffocws ychwanegol ar ganlyniadau i blant a phobl ifanc a ffocws bellach ar integreiddio gwasanaethau. Cyfeiriodd at y gwaith peilot wedi'i ymgymryd gan Gyngor Sir Ynys Môn o ran y 'gyllideb gyfun' ac mae Llywodraeth Cymru wedi croesawu'r prosiect am ei fod y Bwrdd Partneriaeth Rhanbarthol cyntaf yng Nghymru i gyflwyno'r cynllun 'cyllideb gyfun' yn llwyddiannus; disgwylir i Lywodraeth Cymru gyflwyno'r cynllun 'cyllideb gyfun' i Fyrddau Partneriaeth Rhanbarthol eraill fel arfer da. Mae cyfanswm o £3.4m wedi ei dod o gyllid ICF tuag at ariannu 40 prosiect at yr Ynys.

Fe wnaeth y Pwyllgor ystyried yr adroddiad a gwneud y pwyntiau canlynol :-

- Codwyd cwestiynau ynghylch lleoliad y 40 prosiect sydd wedi derbyn cyllid ICF ar yr Ynys. Dywedodd Cyfarwyddwr Gwasanaethau Cymdeithasol y darperir y prosiectau ar draws yr Ynys yn ddibynnol ar anghenion penodol e.e. Cartrefi Clyd sydd wedi eu lleoli ble mae adeiladau ar gael o fewn dalgylchoedd ysgolion. Nododd ymhellach fod prosiectau eraill wedi cynnwys y trydydd sector e.e. Mencap Môn (am fod diffyg cefnogaeth i rieni newydd sydd â phlant gydag anghenion addysgol arbennig). Nododd y gallai gynllun peilot o'r fath gael ei gyflwyno ar draws Gogledd Cymru yn y dyfodol. Mae cyllid ICF hefyd wedi cefnogi prosiectau gwasanaethau oedolion ledled yr Ynys;

- Codwyd cwestiynau ynghylch i ba raddau mae'r Bwrdd Partneriaeth yn ystyried fod y Tîm Adnoddau Cymunedol yn cyflawni gweledigaeth y Cynllun Gweithredu o integreiddio rhwng y gwasanaethau iechyd a chymdeithasol yn rhanbarthol. Dywedodd Cyfarwyddwr Gwasanaethau Cymdeithasol fod gan y Tîm Adnoddau Cymunedol weledigaeth lefel uchel gyda 3 tîm prosiect wedi'u hymgorffori o fewn yr Awdurdod. Mae cynllun yn ei le i fonitro pa mor effeithiol yw perfformiad y tîmau. Nododd ymhellach fod grŵp ar y cyd a'r bwrdd iechyd a gwasanaethau cymdeithasol wedi ei sefydlu fel nad oes rhaid i bobl gysylltu ag ystod o ddarparwyr gwasanaethau ar gyfer y cymorth;
- Cyfeiriwyd at gyfarfod diwethaf y Pwyllgor hwn pan gyfeiriodd Prif Weithredwr Bwrdd Iechyd Betsi Cadwaladr at y mesurau trawsnewid a gwella y mae'r Bwrdd yn eu cymryd yn enwedig o ran Iechyd Meddwl. Codwyd cwestiynau ynglŷn â sut yr oedd y Bwrdd Partneriaeth yn cefnogi'r Bwrdd Iechyd o ran y mesurau trawsnewid. Dywedodd Pennaeth Cydweithio Rhanbarthol fod cyfarfodydd am gael eu cynnal yn y dyfodol agos gyda'r Bwrdd Iechyd i drafod sut y gallai'r Bwrdd Partneriaeth gefnogi'r mesurau trawsnewid. Nododd ei bod yn hollbwysig nas yw gwaith y Bwrdd Partneriaeth yn amharu ar neu'n dyblygu gwaith y Bwrdd Iechyd;
- Codwyd cwestiynau ynghylch pa ffyrdd y bydd yn rhaid i raglen waith y Bwrdd Partneriaeth Rhanbarthol gael ei ddiwygio a'i flaenoriaethu o ganlyniad i covid-19, a pha rôl y bydd yn ei chwarae yn ystod y cyfnod adfer. Mi wnaeth y Pennaeth Cydweithio Rhanbarthol ymateb fod y pandemig wedi effeithio llif gwaith y Bwrdd Partneriaeth ac yn enwedig y rhan fwyaf o'r sefydliadau partner. Mae gwaith wedi ei ddatblygu i gynyddu'r capasiti staffio o fewn Gofal Cymdeithasol ac o fewn Cartrefi Gofal.

PENDERFYNWYD nodi'r gwaith a'r cynnydd yn 2020/21 ar y meysydd gwaith sydd yn cael eu dwyn ymlaen yn rhanbarthol drwy Fwrdd Partneriaeth Rhanbarthol Gogledd Cymru.

GWEITHRED : Fel y nodwyd uchod.

4 ADRODDIAD BLYNYDDOL BWRDD GWASANAETHAU CYHOEDDUS 2020/21

Cyflwynwyd - adroddiad gan y Rheolwr Rhaglen, Bwrdd Gwasanaethau Cyhoeddus Gwynedd ac Ynys Môn mewn perthynas â'r uchod.

Adroddodd y Rheolwr Rhaglen, Bwrdd Gwasanaethau Cyhoeddus Gwynedd ac Ynys Môn fod gwaith y Bwrdd Gwasanaeth Cyhoeddus wedi ei effeithio gan y pandemig ynghyd a blaenoriaethau sefydliadau partner yn gorfod cael eu newid. Fodd bynnag, mae'r sefydliadau partner wedi bod yn gweithio'n agos a'i gilydd i gefnogi'r cymunedau lleol yn ystod yr argyfwng iechyd byd-eang. Nododd fod yr adroddiad wedi'i strwythuro i gyfeirio ar gynnydd gwaith pedwar is-grŵp y Bwrdd. Mae arweinwyr is-grwpiau'r Bwrdd yn aelodau o'r Bwrdd Gwasanaethau Cyhoeddus, ac maent wedi bod yn gyfrifol am adrodd ar gynnydd yn ystod cyfnod 2020/21. Fe wnaethon nhw adrodd fod y cynnydd wedi arafu am fod ymateb i'r argyfwng ac adfer cymunedau lleol wedi cymryd blaenoriaeth. Sefydlodd y Bwrdd bedwar is-grŵp gweithredu :-

- Newid Hinsawdd - bu i'r Is-grŵp gael ei sefydlu i annog cydweithio rhwng sefydliadau cyhoeddus ar liniaru effaith newid hinsawdd, ac yn benodol effaith llifogydd arfordirol a mewndirol ar gymunedau. Cynhaliwyd trafodaethau oddi fewn i'r Bwrdd Gwasanaeth Cyhoeddus ynghylch yr angen i weithio'n agos a chymunedau er mwyn cynnal trafodaethau angenrheidiol ynglŷn â beth sy'n bwysig o ran newid hinsawdd a llifogydd yn benodol. Yn ogystal, mae angen i Cyfoeth Naturiol Cymru ynghyd a Chyngor Gwynedd a Chyngor Sir Ynys Môn drafod eu blaenoriaethau o ran newid hinsawdd tra ei bod yn rhaid ystyried bod gan awdurdodau lleol eu blaenoriaethau newid hinsawdd eu hunain a bydd angen sicrhau nad oes dyblygu gwaith a sicrhau fod gwaith yr Is-grŵp Newid Hinsawdd yn ychwanegu gwerth ac yn cefnogi'r rhaglen newid hinsawdd.
- Cartrefi i bobl leol - yn wreiddiol gofynnwyd i'r Is-grŵp sefydlu trefn cydweithio yn y sector tai ac i ddatblygu cartrefi mwy addas a fforddiadwy yn y lleoedd cywir. Mi oedd gan nifer o bartneriaid y Bwrdd gynlluniau eisoes i ddatblygu tai fforddiadwy ond un budd o weithio ar y cyd oedd cyflawni darvoudion maint - yn benodol datblygiad tai ar y cyd i leihau costau datblygu ac i alluogi medru canolbwyntio ar ddatblygu tai arloesol. Dywedodd fod yr Is-grŵp Cartrefi wedi ystyried a chytuno fod eu gwaith yn dirwyn i ben am nad oes unrhyw werth pellach y byddent yn medru ei gyfrannu i'r gwaith sydd yn mynd ymlaen mewn datblygu tai gan sefydliadau unigol. Bydd rhaid i'r Bwrdd felly ail-ystyried y flaenoriaeth hon a chytuno ar ffordd ymlaen.
- Gofal Iechyd a Chymdeithasol Integredig - profodd gwaith yr Is-Grwp mewn gofal iechyd a chymdeithasol yn allweddol yn ystod y pandemig ac yn enwedig i'r gwaith o adfer cymunedau lleol yn dilyn yr argyfwng. Mae ffyrdd newydd o weithio wedi eu datblygu yn rhithiol sydd wedi bod o fudd i'r timau amlddisgyblaethol. Trefnwyd cyfarfodydd wythnosol rhwng partneriaid yn ystod y cyfnod argyfwng i drafod y gwasanaethau o dan y mwyaf o bwysau a chynnig at ymatebion ar y cyd. Dangoswyd parodrwydd i weithio gyda'i gilydd ac addasu i amgylchiadau gwaith heriol. Mae gwaith nawr wedi ail-ddechrau yn y ffrydiau gwaith canlynol; Iechyd Meddwl, Oedolion a Phlant.
- Yr Iaith Gymraeg - mae'r Is-Grwp a'r Bwrdd yn deall pwysigrwydd yr iaith Gymraeg i'r cymunedau lleol ar draws Gwynedd ac Ynys Môn ac mae medru byw eu bywydau drwy gyfrwng y Gymraeg a chael mynediad at wasanaethau cymunedol a gweithgareddau yn y Gymraeg yn bwysig. Mae'r pandemig wedi achosi heriau sylweddol i sefydliadau wrth geisio sicrhau parhad gwasanaethau. Mae gwaith yr Is-Grwp wedi cael ei oedi yn ystod 2020/21 am fod staff perthnasol wedi gorfod gwneud gwaith gwahanol neu wedi gorfod newid blaenoriaethau ac felly nid oedd yr Is-Grwp yn medru cyfarfod yn rheolaidd i yrru'r rhaglen waith yn ei blaen. Fodd bynnag, mae'r Is-Grwp wedi ymrwymo i wella'r iaith Gymraeg ac mae'r Bwrdd yn adolygu'r cynnig prosiect gwreiddiol i newid y ffordd mae'r cyhoedd yn cyfathrebu ac unrhyw newidiadau yn rôl yr ardaloedd derbyn. Amcan y prosiect yw annog y defnydd o'r Gymraeg wrth ymgysylltu a sefydliadau cyhoeddus.

Adroddodd y Rheolwr Rhaglen ymhellach fod rhaid i'r Byrddau Gwasanaethau Cyhoeddus, bob 5 mlynedd, fel un o'r gofynion statudol a gyflwynwyd gan Ddeddf Llesiant Cenedlaethau'r Dyfodol (2015), baratoi a chyhoeddi asesiad o lesiant

economaidd, cymdeithasol, amgylcheddol a diwylliannol eu hardaloedd. Mae Bwrdd Gwasanaethau Cyhoeddus Gwynedd ac Ynys Môn wedi dechrau ar y broses o adolygu'r Aseiad Llesiant. Nodwyd fod gweithdy wedi ei gynnal ym mis Medi 2020 i drafod y rhaglen adfer o ran y pandemig a thrafodaethau ynghylch llesiant cymunedau lleol yng Ngwynedd ac Ynys Môn. Penderfynodd y Bwrdd barhau gyda'r ffrydiau gwaith drwy'r Is-grwpiau wrth gynnal trosolwg o faterion a godwyd e.e. twf mewn Twristiaeth, Ail Gartrefi a diweithdra.

Ystyriodd y Pwyllgor yr adroddiad ac fe godwyd y prif bwyntiau canlynol:-

- Cyfeiriwyd at y broses ymgysylltu a gynhaliwyd yn ystod y cyfnod diwethaf o asesiadau llesiant. Nodwyd nad oedd y presenoldeb yn y digwyddiadau ymgysylltu hyn a drefnwyd gan y Bwrdd Gwasanaethau Cyhoeddus yn dda iawn. Codwyd cwestiynau ynghylch sut oedd y Bwrdd yn bwriadu hyrwyddo a chynyddu diddordeb y cyhoedd i fynychu'r digwyddiadau hyn yn y dyfodol ac os oes tystiolaeth fod preswylwyr yr Ynys wedi cael budd o weithgareddau'r Bwrdd Gwasanaethau Cyhoeddus. Cyfeiriwyd hefyd at rôl y Bwrdd yn yr ymateb i'r pandemig. Dywedodd y Rheolwr Rhaglen fod y Bwrdd wedi dysgu gwersi o'r rownd ddiwethaf o asesiadau llesiant. Bydd ystyriaeth hefyd yn cael ei roi i beth mae sefydliadau partner wedi ei gyflawni, yn enwedig yn ystod y pandemig. Nododd fod y gwaith a gynhaliwyd gan Medrwn Môn mewn partneriaeth â'r Awdurdod hwn i ymgysylltu â'r cymunedau lleol yn ystod y pandemig yn mynd i gyfrannu tuag at yr asesiadau. Dywedodd ymhellach ei bod yn bwysig fod ymgysylltiad gyda phob grŵp o breswylwyr yn hollbwysig o fewn y cymunedau lleol. Nodwyd hefyd o safbwynt rhanbarthol, y cyfeiriwyd at y cydweithio rhwng y pedwar Bwrdd Gwasanaeth Cyhoeddus i gefnogi ymgysylltiad a'r potensial i gomisiynu ymgysylltiad gyda grwpiau anoddach i'w cyrraedd neu na glywir ganddynt yn aml, sy'n byw yng Ngogledd Cymru. Dywedodd y Rheolwr Rhaglen fod y Bwrdd yn ymgysylltu, cefnogi a datblygu blaenoriaethau'r sefydliadau partner ar draws sbectrwm y gwasanaethau a ddarperir gan y sefydliadau hyn.
- Cyfeiriwyd at y mapio Newid Hinsawdd o'r arfordiroedd sydd mewn perygl o gael eu herydu ac fe godwyd cwestiynau ynghylch sut mae'r Bwrdd am fynd i'r afael a'r mater. Dywedodd Arweinydd y Cyngor bod rhaid ystyried nad oes cefnogaeth ariannol i'r Bwrdd Gwasanaethau Cyhoeddus a'i fod wedi ei sefydlu fel rhan o'r Ddeddf Llesiant a Chenedlaethau'r Dyfodol er mwyn sicrhau cydweithio rhwng awdurdodau lleol a sefydliadau. Nododd mai rôl y bwrdd yw ymateb i faterion sy'n codi fel newid hinsawdd ac erydiad yr arfordir a bydd gofyniad gan Lywodraeth Cymru a Llywodraeth y DU i fuddsoddi arian sylweddol er mwyn mynd i'r afael â'r mater.
- Codwyd cwestiynau ynghylch pa mor effeithiol yw'r Bwrdd ac os oes angen adolygu strwythur y Bwrdd a'i bod yn ymddangos fod dyblygu o ran y gwasanaethau a ddarperir. Ymatebodd y Rheolwr Rhaglen fod Pwyllgorau Sgriwtini y ddau awdurdod lleol yn cael Adroddiad Blynyddol gan y Bwrdd Gwasanaeth Cyhoeddus a hefyd y cyfle i graffu trefniadau llywodraethu'r Bwrdd yn flynyddol. Nododd fod y Bwrdd wedi sefydlu nifer o Is-grwpiau ar ddechrau sefydliad y Bwrdd Gwasanaethau Cyhoeddus ond mae'r is-grwpiau hyn wedi cael eu lleihau os credir nad oeddent yn ychwanegu unrhyw werth i'r mater yr oeddent wedi ei sefydlu i fynd i'r afael ag ef.

PENDERFYNWYD nodi cynnydd y Bwrdd Gwasanaeth Cyhoeddus.

GWEITHRED : Fel y nodwyd uchod.

5. ADRODDIAD BLYNYDDOL BWRDD UCHELGAIS ECONOMAIDD GOGLEDD CYMRU AC ADRODDIAD CHWARTER 4 CYNLLUN TWF

Cyflwynwyd— adroddiad gan Gyfarwyddwr Portffolio Bwrdd Uchelgais Economaidd Gogledd Cymru ynghylch yr uchod.

Dywedodd y Deilydd Portffolio ar gyfer Prosiectau Mawr a Datblygiad Economaidd fod Bwrdd Uchelgais Economaidd Gogledd Cymru yn gyfle i adfywio economi Gogledd Cymru yn dilyn y pandemig a Brexit.

Dywedodd Arweinydd y Cyngor ei bod yn dymuno gweld y Bid Twf ar gyfer Gogledd Cymru yn llwyddo a bod y prosiectau yn cael eu cyflawni i gymryd mantais o'r cyllid sydd ar gael. Dywedodd fod gan yr Ynys brosiectau arloesol fel rhan o fidiau twf Bwrdd Uchelgais Economaidd Gogledd Cymru.

Rhoddodd Gyfarwyddwr Portffolio Bwrdd Uchelgais Economaidd Gogledd Cymru gyflwyniad byr i'r Pwyllgor fel a ganlyn:-

Y Portffolio Bid Twf

- **Amcanion Gwariant dros y 15 mlynedd nesâd** - creu rhwng 3,400 a 4,200 net o swyddi newydd yng Ngogledd Cymru.
- **GVA** - i gefnogi cynnydd ychwanegol net GVA o rhwng £2 biliwn a £2.4 biliwn ar gyfer economi Gogledd Cymru drwy'r Bid Twf erbyn 2036.
- **Buddsoddiad** – cyflawni cyfanswm buddsoddiad o hyd at £1.1 biliwn yn Economi Gogledd Cymru drwy'r Bid Twf erbyn 2036.

Bwriad y Bid Twf yw adeiladu economi cynaliadwy a llewyrchus yng Ngogledd Cymru gyda'r prif amcan o gael twf cynaliadwy cynhwysol sydd yn rhan o'r Ddeddf Cenedlaethau'r Dyfodol.

Y Rhaglenni

- **Rhaglen Ddigidol** – Cyflawni newid amlwg yn y cysylltedd digidol sydd ei angen i sicrhau y gall Gogledd Cymru fodloni galw'r defnyddwyr, cynnal cyflymdra â gweddill y DU, datgloi potensial sectorau a safleoedd â blaenoriaeth am dwf a thanategu ecosystem arloesi ffyniannus. Creu hyd at 380 o swyddi erbyn 2036.

Cyfanswm Buddsoddiad £41.7m

- **Rhaglen Tir ac Eiddo** – Mynd i'r afael â'r diffyg tir ac eiddo addas ar gyfer twf busnes a dod â safleoedd ymlaen ar gyfer datblygiadau tai. Cyflawni gwelliannau sy'n symbylu buddsoddiad mewn safleoedd ac eiddo ym mhorthladd Caerdybi a'r ardal ehangach. Creu 2,280 o swyddi erbyn 2036.

Cyfanswm Buddsoddiad £355.4m

- **Rhaglen Ynni Carbon Isel** - Datgloi buddion economaidd prosiectau ynni carbon isel trawsffurfiol a sefydlu Gogledd Cymru fel un o leoliadau arweiniol y DU ar gyfer cynhyrchu ynni carbon isel, arloesedd a buddsoddi yn y gadwyn gyflenwi. Creu 980 swydd erbyn 2036.

Cyfanswm Buddsoddiad £668.5m

- **Rhaglen Arloesi mewn Gweithgynhyrchu Gwerth Uchel** – Cyfnerthu lleoliad Gogledd Cymru fel clwstwr gweithgynhyrchu gwerth uchel pwerus ac arloesol, sy'n adeiladu ar arbenigedd presennol ac arbenigedd byd-eang i greu sail economaidd gwerth uwch, mwy amrywiol sy'n cefnogi trosglwyddo i ynni carbon isel. Creu 180 swydd erbyn 2036.

Cyfanswm Buddsoddiad £39.5m

- **Rhaglen Bwyd-Amaeth a Thwristiaeth** – Adeiladu economi sylfaen mwy cynaliadwy, bywiog a gwydn o fewn y rhanbarth, gan wneud y gorau o gyfleoedd am gyflogaeth a ffyniant drwy ein hamgylchedd a'n tirwedd. Creu 380 o swyddi erbyn 2036.

Cyfanswm Buddsoddiad £41.3m

Fe wnaeth Mr Hedd Williams adrodd ar yr Adroddiad Perfformiad Chwarter 4 i'r Pwyllgor. Nododd mai ffocws y chwarter hwn oedd symud i'r cyfnod cyflawni gyda'r gwaith a gychwynnodd yn Ionawr 2021 gydag adolygiad sylfaenol o'r holl brosiectau i ail-gadarnhau amserlenni ar gyfer datblygu a darparu achosion busnes. Yn ystod Chwarter 4 cynhaliwyd nifer o weithdai, yn unol â'r canllaw Achos Busnes Gwell, i gefnogi'r datblygiad o'r achosion busnes prosiect. Mi wnaeth y ddau brosiect cyntaf gwblhau'r Adolygiadau Porth a nawr yn gweithio i roi sylw i'r argymhellion a wnaed cyn cyflwyno achosion busnes diwygiedig er ystyriaeth. Y ddau brosiect yw prosiect Morlais, dan arweiniad Menter Môn a'r prosiect Peirianeg Menter a Chanolfan Opteg dan arweiniad Prifysgol Glyndŵr Wrecsam. Nododd fod dau brosiect yn adrodd fel 'Coch' ar hyn o bryd sef Safle Strategol Bodelwyddan oherwydd caniatâd cynllunio amlinellol yn dod i ben a Phorth Caergybi oherwydd costau yn codi ac angen i adolygu sgôp y prosiect. Mae nifer o brosiectau yn adrodd fel 'Amber' oherwydd prosesau datblygu busnes, sicrwydd a chymeradwyo yn cymryd mwy o amser na'r disgwyl. Wedi arwyddo'r Llythyr Dyfarnu Grant ac wedi cyflwyno'r ddogfennaeth ofynnol, mae'r rhandaliad cyntaf o £16 miliwn wedi ei dderbyn gan y Llywodraethau ym mis Mawrth, 2021. Bydd yr arian hwn yn galluogi cyflawni prosiectau i ddechrau yn ystod y flwyddyn ariannol nesaf, pan ddisgwylir ystyried a gwneud penderfyniad ar y gyfran gyntaf o achosion busnes prosiect.

Rhoddodd Mr Williams drosolwg o'r Adroddiad Blynyddol i'r Pwyllgor. Roedd yr Adroddiad Blynyddol ynghlwm wrth yr adroddiad.

Ystyriodd y Pwyllgor yr adroddiad ac fe godwyd y prif bwyntiau canlynol:-

- Codwyd cwestiynau os oes risg o brosiectau mawr ddim yn cael eu gwireddu o fewn y Bwrdd Uchelgais Economaidd oherwydd y tensiwn sydd wedi ei adrodd

rhwng Llywodraethau Cymru a'r DU yn ddiweddar oherwydd penderfyniadau ynghylch nifer o faterion. Cyfeiriwyd at Gaergybi, am fod gan Lywodraeth y DU syniadau penodol o 'borthladd rhydd' tra bod Llywodraeth Cymru yn anghytuno. Dywedodd y Cyfarwyddwr Portffolio ei bod yn bwysig rheoli unrhyw risg sy'n codi fel rhan o'r strwythur rheoli rhaglen. Nododd ei bod yn gweithio'n agos gyda Swyddogion o Lywodraethau Cymru a'r DU ac fel partneriaeth bydd yn galluogi economi Gogledd Cymru i ffynnu. Mae cyfarfodydd yn cael eu cynnal yn rheolaidd ac mae costau adnoddau a chostau adeiladu wedi cael eu codi o ran y prosiectau sydd wedi eu cyflwyno er mwyn cymryd mantais o'r Bid Twf. Pwysleisiodd fod y ddwy Lywodraeth eisiau gweld y prosiectau'n llwyddo o fewn y Bid Twf.

- Cyfeirwyd at y dadlau o ran y fargen masnach o ran amaethyddiaeth ag Awstralia yn ddiweddar a'r effaith y gallai ei gael ar amaethyddiaeth yng Ngogledd Cymru. Codwyd cwestiynau ynghylch a yw'r Bwrdd Uchelgais Economaidd wedi ystyried y mater hwn. Ymatebodd y Cyfarwyddwr Portffolio bod y Bwrdd yn edrych ar arloesi ym myd amaeth o ran datgarboneiddio ac nad yw penderfyniadau'r Byrddau wedi newid oherwydd Brexit. Mae'r Bwrdd yn parhau i ystyried bod angen cefnogi busnesau gwyrdd;
- Codwyd cwestiynau ynghylch os oes ymgynghoriad wedi ei gynnal â'r Undebau Llafur o ran creu 3,400 i 4,000 o swyddi newydd o fewn y datblygiadau prosiect sydd ynghlwm â'r Bid Twf. Ymatebodd y Cyfarwyddwr Portffolio nad oedd yn ymwybodol y bu cyfarfodydd nac ymgysylltu â'r Undebau Llafur ond y byddai angen iddi drafod y mater ymhellach o fewn y Bwrdd Uchelgais.
- Codwyd cwestiynau ynglŷn â manylion prosiectau Porth Caergybi. Ymatebodd y Cyfarwyddwr Portffolio fod gan y prosiect ystod o gynlluniau e.e. Morglawdd Caergybi (buddsoddiad ar y cyd â Stena ar gyfer gwelliannau angenrheidiol i'r Morglawdd); buddsoddiad ym Mhorthladd Caergybi mewn perthynas â thir ac eiddo sydd â photensial datblygu a'r gallu i greu cyflogaeth i gefnogi economi Gogledd Cymru. Codwyd cwestiynau pellach ynghylch perchnogaeth Morglawdd Caergybi. Ymatebodd y Dirprwy Brif Weithredwr y deallir mai Stena sy'n gyfrifol am Forglawdd Caergybi ond nododd Llywodraeth y DU a Chymru bwysigrwydd y Morglawdd i Borthladd Caergybi er mwyn sicrhau ffyniant Tref Caergybi.
- Codwyd cwestiynau ynghylch sut y mae cyllid preifat yn mynd i gael ei ddiogelu o fewn y Fargen Twf. Ymatebodd y Cyfarwyddwr Portffolio bod gallu i ddenu buddsoddiad preifat o fewn y prosiect ond byddai angen sicrwydd arnynt fod y prosiect yn hyfyw iddynt fuddsoddi yn y prosiectau hyn. Nododd fod angen ymgysylltu ymhellach â'r sector preifat i ddeall y cyfleoedd y maent yn edrych i fuddsoddi ynddynt megis sectorau twf, sectorau gweithgynhyrchu lefel uwch a sectorau ynni carbon isel.
- Codwyd cwestiynau ynghylch yr heriau neu'r cyfleoedd ychwanegol a ragwelir wrth geisio cyflawni'r prosiectau o ganlyniad i'r pandemig, a sut mae'r Bwrdd yn bwriadu rhoi sylw i'r rhain. Ymatebodd y Cyfarwyddwr Portffolio ei bod yn amlwg bod y pandemig wedi effeithio'n fawr ar yr economi. Nododd fod y Bwrdd Uchelgais wedi ystyried a yw'r buddsoddiad yn y Bid Twf yn dal yn briodol ar gyfer economi Gogledd Cymru ac mae'r pandemig wedi dangos yr angen am gysylltedd digidol. Dywedodd y Cyfarwyddwr Portffolio ymhellach fod angen cyllid refeniw ar gyfer sgiliau cyflogadwyedd ac i greu ymwybyddiaeth o gyfleoedd cyflogaeth ac i arwain pobl ifanc mewn ysgolion a cholegau tuag at y prosiectau hyn.

PENDERFYNWYD cymeradwyo Adroddiad Blynyddol Bwrdd Uchelgais Economaidd Gogledd Cymru ar gyfer 2020/21 a'r Adroddiad Perfformiad Chwarter 4 ac i nodi'r cynnydd.

Gweithred : Fel y nodwyd uchod.

6. RAGLEN WAITH

Cyflwynwyd - adroddiad gan y Swyddog Sgriwtini.

PENDERFYNWYD:-

- **Cytuno ar y fersiwn presennol o'r blaen raglen waith ar gyfer 2021/22;**
- **Nodi'r cynnydd hyd yn hyn o ran cyflawni'r blaen raglen waith.**

Daeth y cyfarfod i ben am 3.00 o'r gloch

**CYNGHORYDD GWILYM O JONES
CADEIRYDD**